

Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnera pillugu Inatsisartut inatsisaat nr. xx, xx. xxxx 2012-imeersoq

(Ineqarnermut, Attaveqarnermut Angallannermullu Naalakkersuisoq)

pillugu

Sanaartornermut Avatangiisinullu ataatsimiititaliap

ISUMALIUTISSIISUTAA.

Siunnersuutip aappassaaneerreqarneranut saqqummiunneqartuq.

Ataatsimiititaliap suliarinninnerani ilaasortat uku peqataapput:

Inatsisartunut ilaasortaq Juliane Henningsen, Inuit Ataqtigiit, Siulittaasoq

Inatsisartunut ilaasortaq Andreas Uldum, Demokraatit, Siulittaasup tullia

Inatsisartunut ilaasortaq Storm Ludvigsen, Inuit Ataqtigiit

Inatsisartunut ilaasortaq Knud Fleischer, Kattusseqatigiit Partiiat

Inatsisartunut ilaasortaq Malik Berthelsen, Siumut

Inatsisartunut ilaasortaq Anders Olsen, Siumut

Inatsisartunut ilaasortaq Kim Kielsen, Siumut

Ulloq 27. september 2012-mi UKA 2012-p nalaani siullermeerneqareermat Ataatsimiititaliap siunnersuut misissorpaa.

Siunnersuutip imaa aamma siunertaa

Inatsisissatut siunnersuummi sorsuttoqarnerani sorsuttoqarnissaanullu aarlerinartoqarnerani pilersaarusiornissamut piginnaatitaaffiup pisortatigoortumik nunatsinnit tiguneqarnissaata piareersarneqarnissaa siunertarineqarpoq. Kalaallit Nunaanni upalungaarsimanermut inatsit pillugu nassuiaammi Inatsisartunut ilaasortanut 25. april 2012-imi agguanneqartumi suleqatigiissitap inassuteqaatai kingulliit inatsisissatut siunnersuutikkut suliarineqarput. Taamaalilluni suliaasaqarfinnut akisussaasuunermut tunngaviusoq Namminersorlutik Oqartussanit tiguneqarsimasunit Kalaallit Nunaanni susassaqaqarfinnit tamakkiisumik

ingerlanneqarsinnaalerpoq. Suliassaqarfinnut akisussaasuunermut tunngaviusoq paasineqassaaq tassaasoq oqartussaasut, suliffeqarfiup sullissiviilluunniit, ulluinnarni suliassaqarfimmut akisussaaffeqartup aamma annertunerusunik ajutoortoqartillugu ajunaarnersuaqartilluguluunniit suliassaqarfimmut akisussaaffeqarnerat. Taamaalilluni ilutigalugu sorsuttoqarneranik sorsuttoqannginneranillu immikkoortitsisarneq Kalaallit Nunaanni upalungaarsimanermik pilersaarusionermi atorunnaassaaq.

Siunnersuutip inatsisartuni siullermeerneqarnera

Inatsisissatut siunnersuut Inatsisartunit siamasissumik tapersorsorneqarpoq. Siunnersuut Ataatsimiititaliamut innersuunneqarpoq, inatsisissatut siunnersuummut kommunit tusarniaanermi akissutaanni ernumassutigisat pillugit Ataatsimiititaliamit isummersortoqarnissaa siunertaralugu.

Tusarniaanermi akissutit

Siunnersuut piffissami ulluni 27. junimit 11. julimut tusarniaassutigineqarsimasoq Ataatsimiititaliap maluginiarpaa. Taamaalilluni tusarniaanermut piffissaliineq sap. ak.-nik marlunnik sivisussuseqarsimavoq, tamannalu sivikingaatsiarpoq, ingammik tusarniaanermi piffissaliussaq sulinngiffeqarnerup nalaaniissimammat. Tamatumunnga atatillugu tusarniaanermi piffissaliineq pillugu ataatsimut isigalugu eqqarsaatersuutinik Ataatsimiititaliaq saqqummiusserusuppoq. Inatsisartut Inatsisinut ataatsimiititaliaata UPA 2000/9-p suliarineqarnerani tusarniaanermik piffissaliinerit nalinginnaasumik sivikinnerpaamik sap. ak.-ni sisamanit sivikinnerusunngorlugit aalajangerneqartariaqanngitsut oqaatigisimavaa. Taamaattorli siunnersuutip katitigaanerata annertussusaatalu tusarniaanermi piffissaliinerup sivitsorneqarnissaa tigussaasumik pissutissaqartissinnaavaa. Taamatuttaaq piffissaliussaq sivitsorneqassaaq tusarniaanermi piffissaliineq sulinngiffeqarnerup nalaaniippat. Inatsisinut nassuiaatinut najoqqutassat atuuttut malillugit tusarniaanermi piffissaliineq tunngaviatigut sivikinnerpaamik sap. ak.-inut sisamanut aalajangerneqartarpoq, sulinngiffeqarnerullu nalaani sap. ak.-inut arfinilinniit arfineq pingasunut.

Siunnersuummut uunga atatillugu Ataatsimiititaliap maluginiarpaa siunnersuut tusarniaassutigalugu nassiuunneqannginnerani KANUKOKA-p sap. ak.-inik marlunnik tusarniaanermut piffissaliineq akuersaarsimagaa. Taamaalilluni KANUKOKA-mut aamma kommuninut atatillugu tusarniaanermik piffissaliineq sivikitsaq toqqaannartumik assuarliutigissallugu pissutissaqanngitsaq Ataatsimiititaliaq isumaqarpoq, taamaattorli tusarniaanermut sivikitsumik piffissaliineq pissutigalugu siunnersuutip sunniutissaanut – ingammik aningaasaqarnikkut sunniutissanut – isummernissaq periarfissaasimanngitsaq kommunit arlallit tusarniaanermi akissutiminni taavaat.

Tusarniaanermut sivikitsumik piffissaliineq aamma tusarniarneqartut sinnerinit uparuarneqarpoq. Taamaattumik inatsisiliornermut atatillugu tusarniarneqartut tusarniaanermi

naammaattumik piffissalernerqartarnissaannut isumannaarinissamut Ataatsimiititaliap Naalakkersuisut kaammattorpai.

Ataatsimiititaliap siunnersuummik suliaqarnera

Siunnersuutip nassuiaatitaani nalinginnaasuni takuneqarsinnaavoq, ajornartoornermi sorsuttoqarneraniluunniit suliaasat isumagineqarnissaat siunertaralugu pilersaarusiortarnej, oqartussaasut ulluinnarni suliaasanik isumaginnittarnerinut, kiisalu ajutoortoqarnerani ajunaarnersuaqarneranilu suliaasat pineqartut isumagineqarnerisa ingerlaannarnissaannut pilersaarusiortarnermut qanittumik atasuusooq. Taamaalilluni suliaasaqarfinni Namminersorlutik Oqartussanit tiguneqareersimasuni pilersaarusiortarnej ataatsimut isigalugu ajutoortoqartillugu, ajunaarnersuaqartillugu sorsuttoqartilluguluunniit pisoq apeqqutaatinnagu taamaaginnassaaq. Taamaattumik isumalluutit ajutoortoqarneranit ajunaarnersuarnillu pilersunut atugassat, annertunerpaatigut taakkuupput sorsuttoqarnerata sorsuttoqarnissaanulluunniit aarlerinartorsiornerup kingunerisaanik ajoqusernermut atornejartussat. Tamanna tunngavigalugu inatsisissatut siunnersuummi nalilernejarpoq, nunatsinnut nuussineq pisortanut aningaasaqarnikkut aqutsinikkullu sunniuteqassanngitsooq.

Taamaattorli KANUKOKA-p kommunillu tamatumunnga atatillugu uparuarpaat, siunnersuutip nunatsinnut nuunneqarnerani kommunit upalungaarsimanermut pilersaarutit allanngortissagaat, upalungaarsimanermillu ilinniartitaanermi sungiusarnermilu akussaaffeqarfiit nutaat ilanngussuunneqarnissaat pisariaqassasoq. Tamanna tunngavigalugu kommunit KANUKOKA-lu isumaqarput, kommunit naliliinerat aallaavigalugu akissaaajaatit piviusorpalaartut ataatsimoortumik tapiissutit isumaqatigiinniutigineqarnissaannut ilanngunneqartariaqartut.

Inatsisissatut siunnersuut aamma tusarniaanermi akissutit tunngavigalugit Nunatsinnit tiguseq komminut aningaasartuuteqarnerunermik kinguneqassanersoq Ataatsimiititaliap nalilersinnaanngilaa, sorsuttoqarneranimi sorsuttoqarnissaanulluunniit aarlerinartorsiornermi kommunit upalungaarsimanermut suliaasa kiisalu ajutoornernit aamma ajunaarnersuarnit maanna kommunit suliaasa assigiinngissuteqarnerannik tigussaasumik assersuutissaqanngimmat.

Inatsisissatut siunnersuut kommuninut aningaasartuutaanerusussatut kinguneqassagalarpat, tamanna kommunit aamma Namminersorlutik Oqartussat akornanni ataatsimoortumik tapiissutit isumaqatigiinniutigineqarnerannut ilanngunneqassasoq Ataatsimiititaliap kaammattuutigaa.

Siunnersuummut tusarniaassutigineqartumut atatillugu, KANUKOKA-p aamma kommunit § 7 maanna ilusimisut ingerlateqqinneqassasoq pillugu kissaateqarnertik oqaatigaat. Siunnersuummi ilaatigut siunnersuutaavoq, upalungaarsimanermut pisortap sanaartukkat

pillugit sullissinermi ikuallattoornissamut teknikkimut tunngasumik ilinniarsimasuunissaa pillugu § 7, imm. 4-mi piunasaqaataasoq peerneqassasoq. Aamma kommunit KANUKOKA-llu kaammattuutigaat, inatsisissatut siunnersuutip ilaani aarlerinartoqarneranik tunngaveqartumik annertussusiliineq kommunit upalungaarsimaneranni ilanngunneqassanngitsoq, kisiannili kingusinnerusumut kinguartinneqassasoq. Tamatumunnga atatillugu Ataatsimiititaliap maluginiarpaa, KANUKOKA-p aamma kommunit kaammattuutaat Naalakkersuisunit malinneqarsimasut. Naalakkersuisut naliliipput, aarlerinartoqarneranik tunngaveqartumik annertussusiliinermik atuutilersitsinissap isummersorfigereernissaata, aamma annertunerusumik ilinniartitaanerit aalajangersarnissaasa kiisalu Naalakkersuisut, kommunit ataasiakkaat KANUKOKA-llu akornanni annertussusiliinermik isumatigiissuteqarnissaata tungaanut, kommunit upalungaarsimaneranni aarlerinartoqarneranik tunngaveqartumik annertussusiliinerup atuutilersinnerata kiisalu § 7-ip allanngortinnerata kinguartinneqarnissaat pisariaqartoq.

Siunnersuummi tusarniaassutitut nassiunneqartumi annaassiniartarnermik upalungaarsimanermik annertussusiliineq Naalakkersuisunit kommuninut tunniunneqassasoq siunnersuutigineqarpoq, tamatumalu kingunerissavaa, ulluinnarni upalungaarsimaneq kommunimi mianerisassat nalilerneqarnerat kiisalu kommunalbestyrelsip nalileereerneratigit isiginiagassat aallaavigalugit, kommunit ulluinnarni upalungaarsimaneq aaqqissuutissagaat.

Upalungaarsimanermit pilersaarutit inatsisitigit pisussaaffigineqartut, Inatsisartullu inatsisaat nr. 14, 26. maj 2010-meersumi piunasaqaataalersut, kommunillu tamatumunnga atatillugu aningaasatigit pissarsissutigisimasaat, suliluarineqarsimannginnerat Ataatsimiititaliap ernumanartutut isigaa. Peqatigitillugu kommunit maanna kinguaattoorutaat kommunit annaassiniarnissamut upalungaarsimasunik naleqqussaannissamut/annertussusiliinissamut akisussaaffimmik tigusinissaannut maannakkorpiat akornutaasut pillugit Naalakkersuisut naliliinerannut Ataatsimiititaliaq isumaqataavoq.

Taamaattumik upalungaarsimanermit pilersaarutit inatsisitigit pisussaaffiusut piffissap naammaginatsumik sivisussusillip ingerlanerani kommuninut suliarineqareersimanngippata suliarineqarnissaannut Naalakkersuisut suliniuteqassasut Ataatsimiititaliap kaammattorpai.

Siunnersuutip aningaasaqarnikkut sunniutissai

Siunnersuutip nassuiaatitaani nalinginnaasuni siunnersuutip akuerineqarneratigit aningaasaqarnikkut sunniuteqassanngitsoq allassimavoq. Tamanna tunngavigalugu allatut naliliinissamut Ataatsimiititaliaq tunngavissaqanngilaq.

Ataatsimiititaliap inassutai

Ataatsimiititaliaq isumaqatigiittoq inatsisissatut siunnersuutigineqartog
akuerineqassasog inassuteqarpog.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Juliane Henningsen
Siulittaasog

Kim Kielsen

Andreas Uldum

Malik Berthelsen

Storm Ludvigsen

Anders Olsen

Knud Fleischer